



18 JUN, 2024

Pendekkan tempoh bertugas bagi jawatan kritikal kastam

Berita Harian, Malaysia



Page 1 of 2

Pendekkan tempoh bertugas bagi jawatan kritikal kastam

Cadangan MCW tutup ruang undang salah laku jejas integriti kakitangan JKDM

Oleh Muhammad Yusri Muzamir
 yusri.muzamir@bh.com.my

Kuala Lumpur: Tempoh penugasan dan penempatan bagi perjawatan kritikal Jabatan Kastam Diraja Malaysia (JKDM) wajar dipendekkan selepas terpalit pelbagai krisis membabitkan tahap integriti kakitangannya.

Presiden Pemerhati Rasuah Malaysia (MCW), Jais Abdul Karim, berkata ia bagi mengurangkan pengaruh dan hubungan yang mungkin terbentuk, selain wajar dilaksanakan susulan tahap integriti kakitangan JKDM dikatakan pada tahap kritikal.

Beliau berkata, isu integriti kakitangan JKDM turut didorong pendedahan sindiket kontena lari cukai (kontena terbang) serta pelbagai kes terkini yang masih dalam siasatan pihak berkuasa.

Katanya, tindakan tegas yang konsisten dan adil terhadap pelaku kesalahan mampu memperbaiki imej dengan menunjukkan komitmen untuk menegakkan integriti dan memulihkan kepercayaan awam terhadap JKDM.

"MCW berpendapat, terdapat hubungan erat di antara rasuah



dan penguat kuasa ekor kuasa dan tanggungjawab besar dimiliki mereka.

"Kes rasuah membabitkan penguat kuasa menunjukkan kelemahan dalam sistem pengawasan negara dan perlunya reformasi integriti dilaksanakan segera.

"JKDM juga wajar memperketatkan prosedur pengawasan dan audit dalaman, meningkatkan penggunaan teknologi untuk memantau aktiviti harian, menyediakan latihan berterusan mengenai etika dan integriti.

"Selain itu, jabatan berkenaan wajar mengenakan hukuman tegas terhadap kakitangannya yang disabitkan bersalah," katanya kepada BH.

Beliau mengulas penegasan JKDM yang tidak akan berkompromi dan melindungi mana-mana pihak jika terdapat dakwaan berasas yang terbukti benar berlaku salah laku membabitkan pegawai dan anggotanya.

Minggu lalu, tujuh individu termasuk pegawai JKDM terbabit dalam kes kontena terbang yang bergiat aktif di Pelabuhan Klang, Selangor ditahan dalam Op Transit.

Semua yang ditahan disyaki

bersekongkol dengan sindiket penyeludupan barangan import di Pelabuhan Klang, mengakibatkan ketirisan cukai, dianggarkan bernilai RM3.5 bilion.

Hasil operasi dijalankan Suruhanjaya Pencegahan Rasuah (SPRM) dan JKDM itu menahan 19 kontena yang mengandungi pelbagai barangan import.

Susulan itu, SPRM menghubungi Biro Siasatan Amalan Rasuah (CPIB) Singapura dalam usaha menjejak seorang warga negara berkenaan yang disyaki dalang utama kes terbabit.

Jumaat lalu, Ketua Pesuruhjaya SPRM, Tan Sri Azam Baki, berkata SPRM sedang menyiasat lebih 100 syarikat penghantar yang dikesan terbabit dalam menyeludup barangan import.

Syarikat terbabit disyaki membuat pengisytiharan cukai palsu susulan tangkapan kes rasuah di Pelabuhan Klang serta satu lagi kes ketirisan hasil cukai sebanyak RM2 bilion di Lapangan Terbang Antarabangsa Kuala Lumpur (KLIA), sebelum ini.

Mesej jelas atasi rasuah

Sementara itu, Jais berkata, komitmen Jabatan Imigresen Malaysia mengenakan tindakan pecat, turun pangkat atau tahan gaji jika kakitangan terbabit salah laku integriti adalah mesej jelas agensi itu bagi mengatasi isu terbabit.

"Tindakan sedemikian mahupun pendakwaan di mahkamah mempunyai kelebihan masing-masing.

"Tindakan dalaman seperti pemecatan atau penurunan pang-

"JKDM juga wajar memperketatkan prosedur pengawasan dan audit dalaman, meningkatkan penggunaan teknologi untuk memantau aktiviti harian, menyediakan latihan berterusan mengenai etika dan integriti"



Jais Abdul Karim,
 Presiden MCW

kat boleh diambil dengan lebih cepat dan memberikan kesan segera.

"Bagaimanapun, pendakwaan di mahkamah penting untuk memberi kesan jangka panjang dan memastikan pelaku mendapat hukuman setimpal dengan kesalahan mereka.

"Gabungan kedua-dua pendekatan tindakan punitif itu adalah yang terbaik untuk menangani isu integriti secara menyeluruh," katanya.



18 JUN, 2024

Pendekkan tempoh bertugas bagi jawatan kritikal kastam

Berita Harian, Malaysia



Page 2 of 2

SUMMARIES

Cadangan MCW tutup ruang undang salah laku jejas integriti kakitangan JKDM

Kuala Lumpur: Tempoh penugasan dan penempatan bagi perjawatan kritikal Jabatan Kastam Diraja Malaysia (JKDM) wajar dipendekkan selepas terpalit pelbagai krisis membabitkan tahap integriti kakitangannya. Presiden Pemerhati Rasuah Malaysia (MCW), Jais Abdul Karim, berkata ia bagi mengurangkan pengaruh dan hubungan yang mungkin terbentuk, selain wajar dilaksanakan susulan tahap integriti kakitangan JKDM dikatakan pada tahap kritikal.